



UPA 2026/68

29/4-2026

Margrethe Thårup Andersen

Ulluunerani paaqqinnittarfinni tamani inimi ataatsimi atorfiit akuerisaasut minnerpaamik sisamangortinneqarnerisigut aningaasatigut, allaffissornikkullu kingunissaanik ersarissaasumik nassuiaasiornissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaqaq Pipaluk Olsen, Demokraatit)

(Siullermeerineq)

Demokraatit Inatsisartunut ilaasortaata Pipaluk Olsenip siunnersuutaanut uunga pitsaasumut qujanaq. Ulluunerani paaqqinnittarfinni pissutsinut, meeqqanullu aamma sulisunut pitsaanagerusumik sinaakkutissiinissamik kissaateqarnermik siunnersuut aallaaveqarpoq.

Meeqqap inuunerani ukioq siulleq aalajangiisuusoq tamatta nalungilarput. Tassani toqqissisimaneq, atassuteqaatit, ineriartornerlu ilusilerneqartarput, tassanissaarlu inuunerup sinneranut tunngavissaq tunngavissinneqartarluni. Tamanna pillugu ulluunerani paaqqinnittarfiutitsinni pitsaassuseq pingaaruteqaannangilaq. Aalajangiisuulluinnarpoq. Meerartatsinnut tunngavoq, aammali sulisunut ullut tamaasa annertumik akisussaaffeqartunut, pissutsinilu ilungersunakkajuttuni allannguisunut tunngalluni. Ulluunerani paaqqinnittarfiutitsinni meeqqanut, inersimasunullu atugassanik pitsaanagerusunik pilersitsisariaqarpugut.

Tamanna pillugu Demokraatit Inatsisartunut ilaasortaata Pipaluk Olsenip siunnersuutaa manna akisussaassuseqarlunilu pisariaqarpoq. Nukingiussamik aalajangiisoqarnissaa siunnerfigineqanngilaq, atorfinnili akuerisaasunik minnerpaaffiliinissap kingunissai nalilerumallugit tatiginartunik, paasissutissanillu tunngavissaqarnerunissamik siunertaqarluni. Taamatut periaaseqarnissaq Demokraatinit isumaqatigaarput. Meeqqat atugarissaarnerat, sulisullu sulinermi atugaat pingaaruteqartigisut eqqartortillutigit aalajangiinerit paasissutissanik, suliarilluakkanillu tunngaveqassapput.

Atorfiit akuerisaasut ikippallaartillugit kinguneqarmat qularisassaangilaq. Sulinermi avatangiisit sunnerneqartarput, sulisut sulerulunnerulersarput, naggataatigullu meeqqat piffissaqarfigineqarnissaminut, qanilaarfigineqarnissaminnullu pisinnaatitaaffiat eqqorneqartarluni. Tamanna pillugu atorfinnik akuerisaasunik minnerpaaffiliineq sulinermut qanoq sunniuteqassanersoq pitsaanagerusumik tamat isiginnissuteqarnissarput pingaaruteqarlunilu piffissanngorpoq.

Tamanna pillugu Demokraatit siunnersuut tapersorsorpaat. Akisussaaffimmik qanoq tiguisinnaanitsinnut, aalajangiinissami tunngavissiilluarsinnaanitsinnut, ilutigisaanilla ilaqutariinnut isumalerujussuarmut ukkataqalersitsinnaanitsinnut tamanna assersuutissaqqippoq.



Taamatut oqaaseqarlunga siunnersuut Kultureqarnermut, Ilinniartitaanermut Ilisimatusarnermut Ilageeqarnermullu Ataatsimiititaliamit nangillugu oqaluuserineqarnissaanut innersuussutigaarput.